

LEZOKO ELKARTE KOORDINAKUNDEAREN SORRERA DELA ETA

Lezoko herrian jakina da orain dela denboralditxo bat, herriko elkarte guztiek koordinakunde bat sortu zutela. Koordinakunde honen zereginak, funtzioak, egitasmoak... eta abarrekoak jakiteko bertako partaidea den Maria Jose Intxaurrendietari galderatxo batzuk egingo dizkiogu:

1.- Zein elkartek osatzen dute koordinakundea?

Esan genezake Lezoko elkarte gehienak gaudela koordinakundean, hain zuzen: Oroitzene A.E.K. euskaltegia, altamira auzo elkarte, altamirako gazteak, Askagintza, Allerru, Dantza eskola, Ekaitz, Eskalada taldea, Euskara taldea, Gestorak, Hezikuntza guraso elkarte, Haurtxo haur eskola, Ixkulin, Lezoko ekolojia taldea, Lezoko zine Klub, Lurralde, Pysbe auzoko elkarte, Senideak, Tiñelu, Txerrimuño, Txistu taldea.

2.- Noiz eta non biltzen zarete?

Haisera batean Andreonen biltzen ginen eta denbora asko horrela eman genuen bainan geroago, udaletxeak bilera bakoitzeko eskaera txostena betetzea esijitzen zigula eta, lekuz aldatzea erabaki genuen. Gaur egun bilerak Ekaitzek duen aretoan egiten ditugu. Esan beharra dago zenbait unetan bilerak astero egin ditugula eta, oraindik gehiago batzutan aste berberan bi eta hiru aldiz elkartu izan gara.

3.- Zertarako izan da sortua?

Talde eta elkarten partaidetza azken urteetan errealitate bat izan da gure herrian. Lau urtean zehar kultur batzordearen bidez, gehien bat bideratu dugu lan hori.

Hauteskundeak direla eta egoera honek aldaketa izugarria jasotzen du ez direlako batzorderik antolatzen edo behintzat elkarteak parte hartzeko aukerarik ematen duten batzorderik. Horregatik, konbentziturik gaudelako indarrak batu, inizatibak bultzatu eta baliabide urriak aprobetxatzeko erarik egokiena delako sortu da koordinakundea. Azken finean lezoarren eguneroko bizitza osatzen duten elkarte guztiak eragiteko tresna baliogarria iruditzen zaigulako.

4.- Zenbat biltzen zarete?

Badakizu zer gertatzen den horrelako erakunde zabaletan, ba askotan zaila izaten dela denok elkartzea. Alde batetik ez garelako hainbeste elkarte bakoitzean eta bestaldetik badagoelako beti zerbait egin beharra. Orokorrean gehiengoak elkartzen gara baino gehien bat oso ekintza edo lan konkretu bat aurrera eramane behar dugunean. Eguneroko lana, txingurrien lana, zailago egiten zaigu denoi.

5.- Zuen arteko harremak nolakoak dira?

Laburki esanda irekiak eta aberatsak iruditzen zaizkit. Kontutan hartu behar dugu oso pertsona desberdinak gaudela, pentsakera desberdinekoak, bainan hori ez da izan

oztopo gure lanean. Alderantziz oso aberatsa izan da eta denok izan dugu eta dugu aukera gure irizpideak botatzeko. Askotan eztabaida gogorrek ere izan ditugu baina nere ustez garbi dago denak beharrezkoak garela.

6.- Harreman honek zein fruitu eman dio Lezoko herriari?

Nere ikuspuntu apaletik esango nuke gure arteko elkartasun hori herrian ere nabaritzen dela. Zertan? Ba askotan elkarte bakoitzak antolatzen dituen zenbait ekintzetan besteen partaidetza ere jaso duelako eta nolabait taldeko lanaren helburua gauzatzen ari garelako. Bizi garen gizarte indibidualista honetan ez da erraza baina gutxienez saiatzen gara, zertxobait behintzat, auzo lana bultzatzen.

7.- Koordinakunde honek galerazten al du elkarte bakoitzaren lan autonomia?

Baterez. Elkarte bakoitzak bere urteko programa burutzen du. Koordinakundearen bakarrik taldean egin behar diren lanak gauzatzen saiatzen gara.

8.- Lezoko herrian atal dexente daudela jorrazteko eta guztietara iristea ezina dela begibistakoa da. Hau honela izanik, lantzeko gaia edo atala zein erizpidearen arabera aukeratu duzue?

Erizpideak? Beno ez dut uste hain zehatzak garenik baina nahiko garbi daukagu denok egin dezakegun zerbait izatea beharrezkoa dela elkarteetan eztabaidatua eta premiazkoa ikusten dena, beti ere gure indarrak neurtuz.

9.- Aurrera begira ze egitasmo dituzue?

Momentuz bi komisio daude lanean, bata Lezo aldizkaria bultzatzen ari dena eta bestea, «Jaizkibel» erdigunea izanik, zenbait ekintza lantzen ari dena herritarren artean errealitatearen ezagupena sakontzeko eta sentzibilitatea pizteko.